



8. juni 2026

Til alle beitelaga i Vestland fylke

Organisert beitebruk – informasjonsbrev våren 2026

Sommaren og beitesesongen er i gang, og vi gler oss over at det har blitt skipa fleire nye beitelag i fylket. I Vestland er det om lag 205 beitelag som nyttar store delar av fylket til matproduksjon gjennom beitesesongen. Det er ei aktiv næring, med mykje godt samarbeid og stor aktivitet!

I dette brevet kan du lese om

- Tilsynslistar/ rapportskjema
- Vilkår for driftstilskot
- Bandtvang
- Rovvilt

Tilsynsliste/rapportskjema

Det er krav om tilsyn i beiteområdet minimum ein gong per veke. De kan nytte vedlagte skjema for å få inn opplysningar om beitesesongen. Leiar i laget skal rapportere inn ei samla oversikt i søknaden om driftstilskot. Søknadsfrist er 15. november. Be gjerne medlemmane i laget om å fylle ut skjemaet og sende det til leiar før de søker om driftsmidlar i haust.

Det er berre tal tapte dyr på utmarksbeite som skal inn i statistikken for organisert beitebruk. Tap inne og på vår- og haustbeite skal ikkje takast med. For at vi skal lukkast best mogeleg med tapsførebyggjande arbeid, er det viktig at kvar dyreeigar melder inn både sikre og trulege tapsårsaker for buskapen sin.

Vilkår for driftstilskot

I følgje forskrifta kan ikkje kommunen løyve driftstilskot til beitelaget dersom desse punkta manglar i søknaden:

- Dato for årsmøtet i søknadsåret (i tida mellom 16. november 2025 og 15. november 2026).
- Kor mykje midlar (sum i kr) beitelaget har på konto 1. november 2026.
- Kort oppsummering som viser aktivitet i beitelaget gjennom året samt eventuelle utfordringar for beitelaget.

Både nasjonalt og i Vestland er vi avhengige av aktive beitelag for å få oversyn over tap av dyr og andre tilhøve kring beitebruk. Det er derfor viktig at de rapporterer inn tal til oss når de søker driftstilskot. Det de skriv i den korte årsrapporten i søknaden vert samla og lagt ut på nettsida vår og sendt til Sau og Geit sine fylkeslag, slik at dei kan ta det inn i årsmeldingane sine. Det kan gje oss litt fleire opplysningar enn berre tal.

For å ha rett til driftstilskot til beitelaget må de arrangere årsmøte i søknadsåret. Målet med midlane er å sikre fellestiltak knytt til utmarksbeite, og det er viktig at de faktisk møter kvarandre og diskuterer beitesesongen og eventuelt bruk av midlar i laget.

Når vi sender ut brev til beitelaga nyttar vi e-postadressa som vart brukt ved søknad om drift av beitelag i førre søknadsomgang. Hugs å oppdatere oss og Brønnøysundregisteret når det er endringar.

Bandtvang

Hundeangrep på beitedyr er eit problem som har auka dei siste åra. Som følgje av dette er 'Hund' ein av tapsårsakane de kan krysse av på i rapportskjemaet som ligg ved. Det er viktig å melde inn hundeskade på småfe, det kan du gjere her: [Hund som skader småfe - Norsk Sau og Geit](#)

Dei siste åra har vi sendt dykk plakatar som er laga i samarbeid med politiet. Dei kan framleis brukast, men de må følgje desse retningslinene:

- **Plakatane skal henge i område der det er bandtvang når det er bandtvang**
Det gir betre effekt når plakaten ikkje er der heile året og folk «ser seg blind» på den. Det er også viktig at informasjon frå politiet ikkje ender som søppel i naturen.
- **Plakatane skal hengast opp etter avtale med oss**
Det betyr at de kan henge dei opp der de vil i beiteområdet dykkar, men dei skal ikkje delast fritt med alle, til dømes ut av fylket.
- **Det er ikkje høve til å skrive egne datoar eller andre ting på plakaten**
Vi har sendt dykk ein plakatmal til dei som har utvida bandtvang i kommunen. Denne kan henge ved sidan av plakaten frå politiet om de ønskjer det.

Vi sender pdf-versjon i eigen e-post til leiaren i beitelaget, og de må skrive ut og laminere plakatan sjølve. I nokre kommunar kan landbrukskontoret hjelpe til med dette.

Freda rovvilt

Ved mistanke om tap grunna freda rovvilt

For ei best mogleg forvaltning av freda rovvilt er det viktig at de melder frå dersom de ser eller finn spor etter freda rovvilt. Meld frå til SNO og/eller legg observasjonane inn i [Skandobs](#) så snart som mogleg. Skandobs er eit felles skandinavisk rapporteringssystem for store rovdyr der det er mogleg for alle å registrere observasjonar av spor og dyr. Observasjonane vert tilgjengeleg for alle og vert også meldt vidare til Statens naturoppsyn (SNO).

Dersom det er mistanke om tap av dyr grunna freda rovvilt er det viktig med dokumentasjon, både for å få sett i verk tiltak og for å kunna sikre erstatning ved tap. Ved funn av kadaver der freda rovvilt kan vere skadegjerar, er det eit krav om at SNO blir varsla dersom ein skal krevje erstatning.

Hugseliste ved funn av kadaver:

- La kadaveret liggje mest mogeleg urørt
- Ta bilete av kadaveret
- Dekk til kadaveret med plast, stein, buskar eller liknande slik at åtseletarar ikkje kjem til
- Merk funnstaden så han er lett å finna att, bruk eventuelt GPS
- Meld i frå til SNO så snart som mogleg
- Ha dette med deg i sekken: mobil/fotoapparat, søppelsekk til tildekking av kadaver, kniv og lange eingongshanskar

Rovviltkontaktane i Vestland:

Luster: Rune Fuglesteg, 476 41 915

Sunnfjord: Sverre Sæten, 404 48 216

Voss: Ingmar Slettemark, 957 09271

Aurland: Håkon Øydvin, 995 67 650

Regionalt fagansvar rovviltokumentasjon: Rein Arne Golf, tlf. 480 94 364

Vi vil oppmode om at de formidlar namn og telefonnummer til rovviltkontakten dykkar og ovannemnde råd kring tap grunna freda rovdyr til medlemne i beitelaget dykkar.

Forvaltningsansvaret for freda rovvilt i region 1 ligg til rovviltnemnda. Leiar for nemnda er Noralv Distad frå Aurland, tlf. 913 74 976. I tillegg er Trude Brosvik frå Gulen og Kine Dale frå Bergen med i nemnda.

Skadefellingsløyve

Skadefelling er eit verkemiddel i akutte skadesituasjonar. Miljøavdelinga hjå Statsforvaltaren gir fellingsløyve innanfor kvotar som er fastsett av rovviltnemnda i regionen. Vedtak om skadefelling er frikopla frå grunneigarretten. Dersom SNO dokumenterer tap grunna freda rovvilt ved kadaverfunn, kan de søkje Statsforvaltaren om skadefellingsløyve. Kontaktperson er Hermund Mjelstad, hermund.mjelstad@statsforvalteren.no, tlf. 481 43 095. I ferietida om sommaren (juli – august) blir det lagt ut kven som er ansvarleg kontaktperson på [heimesa](https://www.heimesa.no) til Statsforvaltaren. Tidlegare Sogn og Fjordane har tre regionale skadefellingslag som blir administrert av Luster kommune. I tidlegare Hordaland har Hordaland Jeger- og Fiskerforbund ei tilsvarande rolle. Skadefellingslag for områda i sør er no lagt til Kvinnherad kommune.

Beitelag eller kommune kan søke om skadefellingsløyve. Søknaden bør innehalde:

- Kven som søker og for kva område
- Kartfesta informasjon om kadaver: tal kadaver totalt, tal undersøkt av SNO, sakna dyr
- Tidsrom for tap eller skade
- Tal dyreeigarar og tal dyr på beite i området

Vi oppmodar om at beitelaget tek kontakt med kommunen for hjelp i ein skadesituasjon.

Lukke til med arbeidet ute i laga og med beitesesongen 2026!

Med venleg helsing

Åshild Irene Lie
seniorrådgjevar



Statsforvaltaren i Vestland

Telefon: 55 57 27 72

E-post: ashild.irene.lie@statsforvalteren.no

Web: www.statsforvaltaren.no/vl

Silje Anette Lyhammer
seniorrådgjevar



Statsforvaltaren i Vestland

Telefon: 55 57 21 51

E-post: silje.lyhammer@statsforvalteren.no

Web: www.statsforvaltaren.no/vl